



Ք Ա Ղ Վ Ա Ծ Ք Ն Ե Ր
ԳԵՐԱԳՈՒՅՆ ՀՈԳԵՎՈՐ ԽՈՐՀՈՒՐԴԻ ՆԻՍՏԵՐԻ
ԱՐՁԱՆԱԳՐՈՒԹՅՈՒՆՆԵՐԻՑ

1973 թ. ՄԱՅԻՍԻ 16-Ի ՆԻՍՏԻՑ

Մայիսի 16-ին, չորեքշաբթի օր.

Վեհափառ Հայրապետի բարձր նախագահությամբ, երեկոյան ժամը 19-ին, Վեհարանում գումարվում է Գերագույն հոգեվոր խորհրդի հերթական նիստը, որին մասնակցում է նաև, որպես Գերագույն հոգեվոր խորհրդի անդամ, Արևմտյան Եվրոպայի հայրապետական պատվիրակ և Ֆրանսիայի հայոց թեմի առաջնորդ տ. Սերովբե արքեպ. Մանուկյանը, որը Հայոց Հայրապետի հրավերով ուխտավորաբար գտնվում էր Մայր Աթոռում:

Ա. Բաց անելով ժողովը, Վեհափառ Հայրապետը ողջունում է տ. Սերովբե արքեպ. Մանուկյանի ներկայությունը Մայր Աթոռում և իր գոհունակությունը հայտնում, որ սրբազան հայրը, պատասխանելով իրեն ուղղված հրավերին, սիրով եկել է Մայր Աթոռ և պատենհությունն ունեցել, որպես Գերագույն հոգևոր խորհրդի անդամ, ներկա լինելու սույն ժողովին:

Այնուհետև Նորին Սրբությունը հրավիրում է տ. Սերովբե արքեպիսկոպոսին, որպեսզի ընդհանուր գծերի մեջ ծանոթացնի ժողովին Արևմտյան Եվրոպայի թեմի վերջին շրջանի գործունեությանը:

Իր հաղորդման սկզբում տ. Սերովբե սրբազանը Արևմտյան Եվրոպայի թեմը բնութագրում է որպես Հայաստանյայց եկեղեցու հաստատուն և ավանդապահ թեմերից մեկը,

որն ինչպես անցյալում, այնպես էլ այժմ, հավատարիմ Մայր Աթոռ սուրբ Էջմիածնին, շարունակում է գործել՝ հոգալով հավատացյալ հայ ժողովրդի հոգևոր կարիքները: Ապա սրբազան հայրը խոսում է մարտի 13—14 օրերին Ֆրանսիայի և Արևմտյան Եվրոպայի Հայաստանյայց եկեղեցիների Փարիզում գումարված խորհրդակցական ժողովի մասին, որին մասնակցել են 20 հոգևորական և 15 աշխարհական պատգամավորներ՝ նշելով, որ այդ համագումարը թեմի վերջին շրջանի գործունեության մեջ հանդիսացավ կարևոր մի նախաձեռնություն, որին լայնորեն արձագանքեց արտասահմանի հայ մամուլը, և որի մասին արդեն մի ընդարձակ տեղեկատվություն է ուղարկել Մայր Աթոռ (Տես «Էջմիածին» ամսագիր, 1973 թ., № 7, էջ 35):

Անդրադառնալով վերջերս Արևմտյան Գերմանիա կատարած իր այցելության մասին, տ. Սերովբե արքեպիսկոպոսը նշում է, որ այդ շրջանում մույնպես հետզհետե կազմակերպվում է տեղի հայության եկեղեցական-համայնքային կյանքը: Արդեն կազմվել են եկեղեցական վարչություններ Քյոլն և Ֆրանկֆուրտ քաղաքներում, ուր պարբերաբար Փարիզից ուղարկվում են վարդապետներ՝ հոգալու համար այդ շրջանում օրավոր բազմացող հայ հավատացյալների հոգևոր կարիքները:

Այնուհետև սրբազանը Վեհափառ Հայրապետի ուշադրությանն է հանձնում Լիոնի շրջանի հայության համար ևս հայրապետական պատվիրակի փոխանորդի դրություն հաստատելու անհրաժեշտությունը՝ ելնելով այն հանգամանքից, որ այդ շրջանում հույն-պես, ինչպես հարավային Ֆրանսիայում, ապրում է բավականին հոծ հայություն, կան ոչ քիչ թվով հայկական եկեղեցիներ և հետևաբար ավելի լայն և կազմակերպված եկեղեցական գործունեություն ծավալելու մեծ հնարավորություններ։ Այդ կապակցությամբ տ. Սերովբե արքեպիսկոպոսը ժողովի նկատմամբ է հանձնում նաև թեմում աշխատող հոգևորականների կազմը համարելու պարագան՝ նշելով, որ թեմը ներկայումս մեծ կարիք ունի պատրաստված եկեղեցական ուժերի, հոգևոր հովիվների։

Ժողովը գոհունակությամբ է ընդունում տ. Սերովբե արքեպիսկոպոսի հաղորդումը Արևմտյան Եվրոպայի թեմի գործունեության վերաբերյալ։ Այդ առթիվ Վեհափառ Հայրապետը անհրաժեշտ է համարում, որ տ. Սերովբե արքեպիսկոպոսը իր թեմի վարդապետներից մեկին հանձնարարի այցելություններ տալ նաև Համբուրգ և Մյունխեն քաղաքները ու այնտեղ ևս կազմել եկեղեցական վարչություններ։ Նորին Սրբությունը միաժամանակ ցանկություն է հայտնում, որ այդ երկու համայնքներում կատարված այցելության մասին պատրաստվի մի հանգամանակից զեկուցագիր, որ նշվեն նորակազմ վարչությունների անդամների անունները, և զեկուցագիրն ուղարկվի Մայր Աթոռ՝ «Էջմիածին» ամսագրում հրատարակելու համար։

* *

Բ. Գերագույն հոգևոր խորհրդի սույն նիստում հաղորդում է լավում այն մասին, որ 1973 թվականի մայիս 3 թվակիր հայրապետական կոնգակով Ռուսաստանի և Նոր Նախիջևանի թեմի առաջնորդ է նշանակվել տ. Նարեկ վրդ. Ծաքարյանը, որն արդեն մեկնել է Մոսկվա՝ ստանձնելու իր նոր պաշտոնը։

Ռուսաստանի և Նոր Նախիջևանի նախկին առաջնորդ տ. Պարզև եպս. Գևորգյանը հրավիրվել է Մայր Աթոռ՝ այլ աշխատանքի անցնելու համար։

Գերագույն հոգևոր խորհուրդը գոհունակությամբ է ընդունում սույն հաղորդումը։

* *

Գ. Այնուհետև Գերագույն հոգևոր խորհուրդը լսում է Գերագույն հոգևոր խորհրդի անդամներ տ. տ. Կոմիտաս արքեպ. Տեր-

Ստեփանյանի և Հովհաննես Թովուզյանի՝ Վեհափառ Հայրապետի բարեհաճ կարգադրությամբ մարտի 23-ից մինչև մայիսի 10-ը Ավստրալիայի հայոց թեմում կատարած հովվական այցելության և թեմի եկեղեցական-ազգային կյանքի մասին հաղորդումները։

Մայր Աթոռի պատվիրակները անձամբ հաղորդել են Հայոց Հայրապետի ողջուններն ու օրհնությունները Ավստրալիայի տիրախնամ թեմի առաջնորդ սրբազանին, հոգևորականության, համայնքային վարչության անդամներին և հավատացյալ ողջ հայությանը։

Պատվիրակներն այցելել են Սիդնեյի և Մելբուռնի հայկական եկեղեցիները, դպրոցները, ակումբները։

Տ. Կոմիտաս արքեպիսկոպոսը թե՛ Սիդնեյում և թե՛ Մելբուռնում պատարագել է և հանին կենաց քարոզությամբ մխիթարել հայ հավատացյալներին։

Գերագույն հոգևոր խորհուրդը գոհունակությամբ արձանագրում է Մայր Աթոռի պատվիրակների հովվական այցելության առթիվ կատարած բարեխիղճ աշխատանքները։

* *

1973 Թ. ՄԱՅԻՍԻ 23-Ի ՆԻՍԻՑ

Մայիսի 23-ին, չորեքշաբթի օր.

Վեհափառ Հայրապետի բարձր նախագահությամբ, ժամը 19-ին, Վեհաքառում դարձյալ գումարվում է Գերագույն հոգևոր խորհրդի հերթական նիստը, որին մասնակցում է նաև տ. Սերովբե արքեպ. Մանուկյանը։

Ա. Սույն նիստում լավում է Մայր Աթոռի Միջեկեղեցական հարաբերությունների բաժնի ընդհանուր քարտուղար Պ. Ծահբազյանի հաղորդումը, նախ բաժնի վերջին երեք ամիսների աշխատանքների և ապա եկեղեցիների համաշխարհային խորհրդի հրավեր-նամակի հիման վրա՝ 1975 թվականին Ջակարտայում հրավիրվելիք համագումարում հայ եկեղեցու մասնակցության մասին։

Գերագույն հոգևոր խորհուրդը սույն հաղորդումը արձանագրում է ի գիտություն։

* *

Բ. Այնուհետև ժողովի նիստում լավում է տ. Արսեն ծ. վրդ. Բերբերյանի զեկուցումը՝ վերջերս Լոնդոնից ստացված մի շարք նամակների մասին, ս. Պետրոս եկեղեցու համայնքային կյանքի ծոցում ստեղծված կացության վերաբերյալ։



Մայր Աթոռի պատվիրակներ տ. Կոմիտաս արքեպ. Ավստրալիայի հայոց առաջնորդ տ. Գաբրիել եպ.

Տեր-Ստեփանյանը, Հովհաննես Թովուզյանը, Գազանճյանը Սիդնեյի կաթոլիկ ծրիմանի հետ

Գերագույն հոգևոր խորհուրդը, քննության առնելով այս կացությունը, կարծիքների փոխանակությունից հետո խնդրում է Վեհափառ Հայրապետին՝ տ. Պատկ արքեպ. Թովմայանին հրավիրել Մայր Աթոռ՝ հանգամանորեն զբաղվելու համար առ. հարցով:

* *

Գ. Գերագույն հոգևոր խորհուրդն իր մասին 23-ի նիստում լսում է նաև Մայր Աթոռի դիվանապետ Հայկ Առաքելյանի՝ Նորին Վեհափառության ուղղած դիմումը՝ առողջական վիճակի պատճառով և թոշակի անցնելու կապակցությամբ, առաջիկա հունիսի

1-ից իր պաշտոնից հրաժարվելու մասին:

Գերագույն հոգևոր խորհուրդը, ըստ արժանվույն գնահատելով Հայկ Առաքելյանի բազմամյա, անխնայ աշխատանքը 1955 թվականի օգոստոսից սկսած, որոշում է կայացնում խնդրել Վեհափառ Հայրապետին՝ ընդառաջելու եղած դիմումին:

Նորին Սրբությունը տալիս է իր համաձայնությունն ու օրհնությունը Հայկ Առաքելյանին:

Գերագույն հոգևոր խորհրդի նույն նիստում Մայր Աթոռի դիվանապետ է նշանակվում տ. Արսեն Ծ. վրդ. Բերբերյանը, որը պիտի շարունակի վարել նաև Միջեկեղեցական հարաբերությունների բաժինը:

